

आकाशवाणी

खबरां पवन वर्मा कोला

1 जम्मू-कश्मीर च पैहले गेड़ दे असैम्बली चुनांस लेई अज्ज 7एं जिलें दे 24

विधानसभा हल्के च वोट पोआए जा करदे न।

2 केंद्र सरकारै प्रमुख खाद्य तेल संघें गी आखेआ ऐ जे ओह मजूदा साङ्गे 12

फीसद सीमा शुल्क आले आयात कीते गेदे तेल दा भंडार उपलब्ध रौहने तगर

एहदे मुल्ल नेई बधान।

3 राष्ट्रपति द्रौपदी मुर्मू होर अज्जै थमां त्रऊं राज्यें राजस्थान, मध्य प्रदेश ते

झारखंड दा अपना दौरा शुरू करडन।

4 प्रधानमंत्री नरेंद्र मोदी होर 21 थमां 23 सितंबर तगर अमरीका च क्वाड

नेताएं दे चौथे शिखर सम्मेलन च शिरकत करडन।

5 हॉकी च मेजबान चीन गी हराइयै भारत नै रिकार्ड 5मीं बारी मर्दे दी

एशियन चैंपियन्स ट्रॉफी अपने नां करी लैती ऐ।

<><><><><><>

J&K Assembly Election

जम्मू-कश्मीर च मते वक्फे बाद अज्ज विधानसभा चुनाएं दे पैहले चरण लेई

मतदान शुरू होई गेआ। 7 जिलें च फैले दे 24 विधानसभा क्षेत्रें च अज्ज वोट

पाने दी प्रक्रिया बड्डलै 7 बजे शुरू होई गई। 23 लक्ख शा मते मतदाता 90

आजाद मेदवारें सने 219 मेदवारें दी किस्मत दा फैसला करडन। चुनाएं लेई सुरक्षा दे पुख्ता इंतजाम कीते गेदे न। दुए चरण दे मतदान इस म्हीने दी 25 तरीक गी होग ते त्रीए चरण लेई मतदान 1 अक्टूबर गी कीते जाडन। मतदान दी गिनतरी 8 अक्टूबर गी होग।

<><><><><><>

PM-J&K Election

जम्मू-कश्मीर विधानसभा चुनाएं दा पैहला चरण अज्जै थमां शुरू होई गेआ। प्रधानमंत्री नरेंद्र मोदी होरें रियासत दे मतदाताएं गी मती गिनतरी च इस लोकतंत्र दे ध्यार च अपनी शमूलियत देने लेई आखेआ ऐ। अपने इक्क सोशल मीडिया पोस्ट च मोदी होरें खास तौरा पर युवाएं ते पैहली बारी आहले मतदाताएं गी इस ध्यार च बदी चढ़िये हिस्सा लैने लेई प्रोत्साहित कीता।

<><><><><><>

Centre-Edible

केंद्र सरकार नै प्रमुख खाद्य तेल संघें गी आखेआ ऐ जे ओह मजूदा साइडे 12 फीसद सीमा शुल्क आले आयात कीते गेदे तेल दा भंडार उपलब्ध राँहने तगर एहदे मुल्ल नेई बधान। खुराक ते सार्वजनिक बंड्ड विभाग दे सचिव संजीव चोपड़ा होरें कल नर्मी दिल्ली च मुल्ल रणनीति दे बारे च बक्ख-बक्ख तेल उत्पादक संघें दे प्रतिनिधिं कन्नै इक बैठक दी प्रधानता कीती। हाल च गै सरकारै बक्ख-बक्ख तेलें दे बुनियादी सीमा शुल्क च बाददा कीता हा। 14

सितंबर थमां सोयाबीन तेल, पाम ते सूरजमुखी दे तेल पर एह सिफर थमां बधाइयें 20 फीसद करी दिता गेआ हा। एहदे करी कच्चे तेलें पर असल शुल्क साइडे 27 फीसद होई गेआ हा। एहदे अलावा रिफाइंड पाम, सूरजमुखी ते सोयाबीन पर बुनियादी शुल्क साइडे 12 फीसद थमां बधियें साइडे 32 फीसद करी दिता गेआ हा। इस चाल्ली रिफाइंड तेलें पर असल शुल्क 35 इशारिया 7-5 फीसद होई जाग। मंत्रालय मुजब सरकार इस बारै बी जानकार ऐ जे घट्ट सीमा शुल्क पर आयात कीते गेदे खाद्य तेलें दा 30 लक्ख मीट्रिक टन दा भंडार एल्ले उपलब्ध ऐ जेड़ा 45 शा 50 दिनें दी घरेलू खपत लेई सुद्धा ऐ।

<><><><><><>

President-Visit

राश्ट्रपति द्रौपदी मुर्मू होर अज्ज थमां त्रऊं राज्यें राजस्थान, मध्य प्रदेश ते झारखंड दी जातरा शुरू करडन। अज्ज ओह जयपुर च मालविया नेशनल इंस्टीच्यूट ऑफ टेक्नोलॉजी दे दीक्षांत समारोह च मुख्ख परौहने दे तौरा उप्पर हिस्सा लैडन ते समारोह गी संबोधित करडन। राश्ट्रपति होर विद्यार्थियें लेई इक नमें 'अरावली हॉस्टल' दा उद्घाटन बी करडन। इस कार्यक्रम च राजस्थान दे राज्यपाल हरी भाऊ किसनराव बड़गे ते मुख्खमंत्री भजन लाल शर्मा बी हिस्सा लैंगन। स्हाड़े संवाददाता दी रिपोर्ट मुजब MNIT दे डरैक्टर प्रो. नारायण प्रसाद पादी होरें दस्सेया जे इस दीक्षांत समारोह च 1 जहार 361 डिग्रियां दित्तियां जाडन जिंदे चा 402 डिग्रियां महिलां विद्यार्थियें गी दित्तियां

जांगन। एहदे मगरा दपैहरी लै राष्ट्रपति होर मध्य प्रदेश दे दऊं दिनें दे दौरे लेई रवाना होई जाडन। अपने इस दौरे दरान राष्ट्रपति होर इंदौर ते उज्जैन च कई कार्यक्रमें च शिरकत करडन।

<><><><><><>

PM-US Visit

प्रधानमंत्री नरेंद्र मोदी होर इस म्हीने दी 21 शां 23 तरीक तक्कर अमरीका दी जातरा लेई जाडन। नरेंद्र मोदी होर Wilimington दे Delaware च 21 सितंबर गी क्वाड नेताएं दे चौथे शिखर सम्मेलन च हिस्सा लैडन। इस बरे दे सम्मेलन दे मगरा अमरीका दे अनुरोध उप्पर अगला क्वाड शिखर सम्मेलन-2025 च आयोजित करने लेई भारत नै सहमति देई दिती ऐ। विदेश मंत्रालय नै आखेआ ऐ जे बैठक च क्वाड नेता पिछले इक बरे दरान संगठन दी होई दी प्रगति दी समीक्षा करडन। ओह हिंद प्रशांत क्षेत्र दे देशों गी उंदे विकास लक्ष्यें ते आकांक्षाएं गी पूरा करने च मदाद करने लेई अगले इक बरे दे लेई सूची बी तय करंगन। मोदी होर इस म्हीने दी 23 तरीक गी न्यू यार्क च संयुक्त राज्य महासभा च “Summit of the future” गी संबोधित करडन। इस सम्मेलन दा विषय ऐ “बेहतर भविष्य आस्तै बहुपक्षीय समाधान” यानि Multilateral solution for a better tomorrow. इस सम्मेलन च बड़ी मती गिनतरी च वैश्विक नेताएं दे शामिल होने दी संभावना ऐ।

<><><><><><>

VP-Gandhi Nagar

उपराश्ट्रपति जगदीप धनखड़ होर अज्ज गांधी नगर च Re-Invest meet दे चौथे संस्करण दे समापन सत्र दी अध्यक्षता करंगन। केंद्री मंत्री प्रल्हाद जोशी होरें कल जानकारी दिती जे राज्य सरकारें ते निजी निर्माताएं सने बक्ख-बक्ख हितधारकें अगले 6एं बरें च अक्षय उर्जा परियोजनाएं च कुल 32.45 लक्ख रुपें दा निवेश कीता ऐ। गांधी नगर च इक प्रेस कांफ्रेंस गी संबोधित करदे होई मंत्री होरें आखेआ ऐ जे उर्जा क्षेत्र च हाल च बदलाव दी लहर च भारत सब्बनें थमां अग्गे ऐ। उनें आखेआ जे एह् समां ऐ जे लोकें गी अक्षय उर्जा बारें जागरूक कीता जा।

<><><><><><>

Telangana-Ganesh Immersion

9 दिनें दे गणेश चतुर्थी दी समाप्ति उपपर कल हैदराबाद च तकरीबन 1 लक्ख भगवान श्री गणेश दियां मूर्तियां विसर्जित कीतियां गेइयां। स्हाढे संवाददाता दी रिपोर्ट मुजब राजधानी तेलंगाना पूरी चाल्ली गणेश भक्ति च लीन लब्बी। गणेश पंडाल दे आयोजकें बड़ी धूमधाम कन्नै गांदे नचदे भगवान गणेश जी गी विदा कीता। अधिकारियें दस्सेया जे तकरीबन 1 लक्ख मूर्तिएं दा तलाएं, नैहरें च विसर्जन कीता गेआ। मूर्तियां परोआने आहली थाहरें दी तैयार ग्रेटर हैदराबाद मुनसीपल कार्पोरेशन दी हद च कीती गेई। शैहरें दे बिच्च-बिच्च हुसैन सागर दे

आले दोआले श्रद्धालुएं दी खासी भीड़ गणेश भगवान दा स्वरूप विसर्जन करने आस्तै दिक्खी गई।

<><><><><><>

AP CM Relief Pakage

आंध्र प्रदेश दे मुखमंत्री एन. चंद्रबाबू नायडू होंरें विजयवाड़ा च आए दे चानचक्क हाड़ कन्नै प्रभावित परोआरें लेई रहत पैकेज दी घोषणा कीती ऐ। कल घोषणा करदे होई मुखमंत्री होंरें आखेआ जे विजयवाड़ा च इस अपदा करी प्रभावित होए दे 32 वार्ड च होए दे नुकसान लेई हर संभव मदाद दिती जाग। उनें आखेआ जे इस आपदा च जिंदे मकानें गी नुकसान पुज्जा ऐ उनेंगी सरकार 25 जहार रपे दी मदाद देग।

<><><><><><>

Puri 100 days

पेट्रोलियम ते कुदरती गैस मंत्री हरदीप सिंह पुरी होंरें मोदी सरकार दे त्रीए कार्यकाल दे 100 दिनें बारे बोलदे होई आखेआ जे सरकार नै देश दे विकास आस्तै बेहतरीन कम्म कीते न। उनें प्रधानमंत्री आवास योजना, उज्जवला योजना ज्नेई सरकारी कल्याणकारी योजनाएं गी सरकरा दी बड़ी उपलब्धि दस्सेया।

<><><><><><>

Gadkari-EPMKN

केंद्री शिडक यातायात ते जरनैली शिडक मंत्री नितिन गडकरी होरें आखेआ जे शिडक ते जरनैली शिडकें दे निर्माण दौरान सरकार नै प्रदूषण फैलाने आहले तत्वे थमां पर्यावरण दी रक्षा गी पूरी तरजीह दिती ऐ। स्वभाव स्वच्छता संस्कार स्वच्छता मुहिम पर गाजियाबाद, उत्तर प्रदेश च आयोजित इक कार्यक्रम गी संबोधित करदे होई गडकरी होरें लोके ते गड्डियां बनाने आहली कंपनिएं गी वैकल्पिक ईंधन दे इस्तेमाल आस्तै आखेआ।

<><><><><><>

Asian

हॉकी च भारत नै जंदी संझा हुलुनब्यूर च मेजबान चीन गी 1-0 कन्नै हराइयै रिकार्ड 5मीं बारी मर्दे दी एशियाई चैंपियन्स ट्रॉफी अपने नां करी लैती ऐ। भारत दे जुगराज सिंह होरें चौथे क्वार्टर च खेड्ढ दा इक्कला गोल दागियै भारत गी बढ़त दोआई। इस प्रतियोगिता च 5 बारी खताब अपने नां करने आला सब्बनै शा कामयाब मुख्य ऐ। अजे तगर दे इस प्रतियोगिता दे कुल 8 संस्करणे चा भारत 6 बारी फाइनल तोहड़ी पुज्जे दा ऐ। जिस्सले के चीन दी टीम पैहली बारी फाइनल च पुज्जी ही। प्रधानमंत्री नरेंद्र मोदी होरें एह खिताब जितने पर भारती हॉकी टीम गी मुबारकबाद दिती ऐ। उनें आखेआ जे अपने शानदार प्रदर्शन कन्नै हॉकी टीम नै पूरे देशै दा मान बदाया ऐ।

<><><><><><>